

## Jaorverslaag v.v. De Wien 2021-2022

Helaas stónd dit vereinigingsjaor nog steeds veural in 't teiken van corona en alle maotregele die vanwaege corona gemak zien. De veurzitters van de Venlose vastelaovesvereniginge hadde regelmaotig euverleg um de coronasituatie en consequenties te bespreeke. Achter de scherme zien weej gewoeën aan de slaag gegaon met de organisatie van ós evenemente.

### *Jaorvergadering*

Vanwaege alle coronaperikele woort de Algemeine Lejevergadering gehalde op 8 september. Tiedes dae vergadering, woort jubilaris Marc Verheijden (11 jaor actief lid) gehuldig. Thea Josten, Monique Rijk, Jacqueline de Ruijgt en Nick Gaspersz (ouk 11 jaor actief lid) ware helaas neet aanwezig, maar zeej zulle op ein ander moment nog gehuldig waere.

### *Leedjesmatinee*

Op zóndaag 10 oktoeëber 2021 kós veur de ierste kier sinds 't begin van corona weer ein evenement georganiseerd waere. Domani waas de plek veur ós 22<sup>e</sup> leedjesmatinee. "Dit mak weer alles good" woort 't winnende leedje, gezóngge door Marc Houwen en Nancy Roodbeen. Meziek en wäörd zien van Marc Houwen. De twieëde plaats ging nao 't leedje "den Ingel" gezóngge door John Baur, François Vervoort en Daisy Gaspersz. De wäörd zien van Herm Mevissen en de meziek van Hay Geritz. En de derde plaats waas veur 't leedje "Sankt Venlo" gezóngge door Gerard Vonk, Jacqueline Derikx, Erik Erprath en Marlie Hanraths. 't Leedje is geschreve door Jos van Kleef & Jules van Bussel met meziek van Jos van Kleef & Wilbert Alberts.

### *Aaftraeje met Joeks*

Vanwaege de oploupende coronabesmettinge vónde weej 't neet verantwoord um ein aaftraeje met diverse artieste en zoeë te organisere. En dus is beslaote um 't aaftraeje in beslaote kringk te halde op 27 november met 't trio, eur vruikes en kinder, iereleje, bestuur, Raod van Elf, Wienmeriekes, bestuursaafvaardiging van de ald prinse, veurzitter van de ald adjudante en de zengers van ózze winnende leedjes.

Vanwaege de steeds vaerder oploupende besmettinge, aanscherping van de maotregele en umdet weej 't trio gen waerdig vastelaovessezoen kóste baeje, hebbe weej helaas op 16 december beslaote um dit seizoen weer gen trio en jeugtrio oet te rope. Eine daag later vólgede 't besloet um gen prinse oet te rope en gen georganiseerde vastelaovesevenemente te organisere in Venlo en Blierick.

### *Joeksige vastelaovesmiddaag*

In de loup van jannewari kwame d'r positieve berichte euver versoepelinge. Bestuur en veurzitters zien metein gaon kieke nao meugelikhede um ein activiteit veur ózze leje te organisere. Op zóndaag 20 fibberwari waas de joeksige vastelaovesmiddaag beej Domani met optraejes van Jules en Gijs, de zengers van 'Dao kump Sjakie haer', ózze eige Wienleedjes, Julia Beurskens, Coen Janssen en Neppie Kraft.

### *Aaftraeje jeugtrio*

Op woensdaag 23 fibberwari is 't jeugtrio in beslaote kringk beej kefee De Witte aafgetraoje.

Weej kinne truuk kieke op ein vraemp vastelaovessezoen zónder trio, jeugtrio en maar inkele evenemente. Haopelik kinne weej kómmend seizoen weer gewoeën ózze eige evenemente organisere.

Sikkertaris,  
Corina Zanders

Veurzitter,  
Ed Faessen